



Sabtu, 24 Desember 2022

Ogen: Matius 1:22-25



SEH KAI SI IKATAKEN TUHAN



Geluhta dem alu pedah ras toto. I bas kerina paksa teptep budaya lit paksa nehken kata ras pedah nandangi anak ras sangkep geluh. I bas kalak Karo, menaken tubuh, sekolah, erjabu janah enggo pe metua tetap la matah kata. Janah kerina pedah e iumputi alu pertoton gelah seh kai si ni pedahkan e. Dikune seh toto ras pedah e, meriah kal ukur janah lit deba si erbahan perpulungen alu nenahken kade-kade guna nuriken keriahen ukur. Subuk tamat sekolah, dat dahin termasuk pe dikune anak ingawanken.

Renungenta paksa enda nuriken kerna sehna kai si enggo ituriken, ikataken ras ipedahkan arah nabi-nabiNa si enggo ngerana nai. Kai siikataken Dibata nai, igelari alu nubuatan, maka sekalak singuda-nguda pagi mehuli kulana dengen ipupusna sekalak anak dilaki. Anak e pagi igelari Imanuel (ertina: Dibata ras kita) si isuratken i bas kitab Jesaya 7:14. I bas ketubuhen Imanuel si igelari Jesus Juruselamat, anak Dibata si nggeluh, ipersingeti ka me paksa malaikat ngerana man Jusup kerna Maria tunangenna. Arah kai siikataken malekat e me maka ialoken Jusup Maria jadi ndeharana seh tubuh anak siipadanken Dibata e man bana.

Kerina siikataken Tuhan, nai nari seh asa genduari tetap isehi sada persada i bas paksana. Bage me kita ngataken kerina si jadi i bas geluhta e me 'waktu Tuhan.' Sabap la lit kai pe si isehken Dibata la jadi. Kerina seh. E maka selaku kalak si tek, ngakuken IA Tuhan ras juruselamatta dengen erpengendes man baNa, ula kal kita ragu kerna pedah ras janji Dibata. Gelemlah e i bas kita ndalani geluta dengen timai paksana Tuhan nehi kerina kai si enggo ipedakhenna subuk arah nabi-nabi, malekat, rasul-rasul sitersurat i bas Pustaka Si Badia. Tetaplah oge kataNa, teptep paksa dengen ndatken pengertin.

Timailah kerina siipadanken Dibata, isehiNa me